

BIDE EDO ZORU PUBLIKOAN TERRAZAK JARTZEA ARAUTZEN DUEN UDAL-ORDENANTZA

Ordenantza hau honako artikulua hauek emandako ahalmenen arabera egin da: Toki Araubidearen Oinarriak arautzen dituen 7/1985 Legearen 49., 85., 139. eta 140. artikulua, ekainaren 13ko 1372/1986 Errege Dekretuak onartutako Toki Korporazioen Ondasunen Erregelamenduaren 77. artikulua, azaroaren 28ko 2568/1986 Errege Dekretuak onartutako Toki Korporazioen Antolaketaren, Funtzionamenduaren eta Araubide Juridikoaren Erregelamenduaren 41. artikulua eta Euskadiko Toki Erakundeei buruzko apirilaren 7ko 2/2016 Legearen 17. artikulua.

I. KAPITULUA

XEDAPEN OROKORRAK

1. artikulua.- Xedea.

1.- Ordenantza honen xedea da bide edo zoru publikoan terrazak eta instalazio osagarri mugikorrak, hala nola eguzkitakoak, toldoak, etab. jartzeko araudi tekniko eta juridikoa ezartzea eta horretarako baldintzak zehaztea. Ez da elementu finkorik onartzen.

2.- Aurreko atalean zehaztutako ondorioetarako soilik, terrazatzat jotzen dira ostalaritzako legezko jardueretan, hala nola tabernetan, jatetxeetan, kafetegietan eta gozotegietan, edo horien antzeko jardura osagarria eta baimendua duten saltokietan eta antzekoetan, osagarri gisa erabiliko diren mahai, aulki eta behin-behineko instalazio mugikorrak. Jarduralizentziaren titular diren pertsona fisiko edo juridikoei emango zaie horretarako baimena.

3.- Ordenantza hau terraza eta mahaitxoei aplikatzeaz gain, bide publikoa okupatzen duten, edo funtzionatzeko horren beharra duten edozein motatako makina edo objektuei aplikatuko zaie, hala nola jardueraren elementu osagarriak (toldoak, alboetako babesak, upelak, mahai altuak, etab.).

4.- Debekatuta dago artikulua honetan, eta oro har ordenantzan, zehaztu ez diren elementuak jartzea, hala nola hozkailuak, mostradoreak, armairuak, bozgorailuak-bafleak, etab.

2. artikulua.- Aplikazio-eremua.

Ordenantza hau erabilera publikokoak diren udalerriko toki guztiei aplika dakieke (bide publikoa, espazio libreak, berdeguneak, etab.), titulartasun publikoko zein pribatukoak izan. Erabilera publikoko izatearen baldintza egitatezko egoerak eta indarrean dagoen planeamenduko zehaztapenak aplikatzeak zehaztuko du.

Nolanahi ere, terraza jartzeko lizentziarako nahitaezkoa da aldeztu aurretik ostalaritza-jardura garatzeko dagokion baimena lortzea.

3. artikulua.- Lizentzia aldeztatik edukirik beharra.

Titulartasun publiko nahiz pribatuko espazio publikoetako instalazio horiek erabilera komun eta bereziko kategoria juridikoa dute, eta, kasu bakoitzean, erabilpen horretarako aldeztatik lortutako udal-lizentzia edukitzea beharrezkoa izango da. Lizentzia hori ordenantza honetan aurreikusitakoaren arabera emango da.

Ordenantza honek araututako lizentzia aldeztatik edukirik beharrik ez dute izango, 1. artikulua ezarritakoa bete arren herriko jai eta ospakizunen inguruan egiten diren aldi baterako jarduerak badira, baina betiere dagokion udal-organoak ezarritako egutegia eta moduak betetzen diren neurrian. Kasu honetan, erabilera honek udalarekin aldeztatik hondakinen bilketarako bitartekoak adostea eskatuko du.

4. artikulua.- Lizentzia ukatzeko arrazoiak. Salbuespenak. Mugak.

1. Udal-organo eskudunak terrazak jartzeko lizentziarik ez ematea erabaki ahal izango du baldin eta:

- a. Bide segurtasunerako kalteak sorrarazten baditu (ikuspena gutxitu, gidariari arreta galarazi, etab.) edo oinezkoen, desgaituen, haur-kotxeen eta abarren zirkulazioa nabarmen eragozten badu.
- b. Ondoko establezimenduei kalteak sorrarazten badizkio (erakusleihoa oztopatu, establezimendurako sarbidea nabarmen murriztu, husteko arazoak, etab.).
- c. Inguruarekin bat ez badator edo formalki desegokia bada, edo hiri-paisaiaren irakurketa zuzena eragozten badu. Halaber, terrazak eta mahaitxoak jartzea debekatu ahal izango da, bide-segurtasuneko arrazoiengatik, herri-lanengatik edo antzeko beste arrazoi batzuegatik.

Halaber, salbuespenezko kasuetan, Udalak banan-banan aztertuko ditu eskaeran azaltzen eta argudiatzen diren inguruabarrak, eta ezohiko moduan eta arrazoituta eman ahal izango du dagokion lizentzia.

II. KAPITULUA

INSTALAZIOAK IBILGAILU-ZIRKULAZIOA DUTEN KALEETAKO ESPALOIETAN

5. artikulua.- Bete beharreko baldintzak

1.- Jabari publikoan terrazak jartzeko baimena emateko, baldintza hauek bete beharko dira:

- a. Okupazioa baimentzeko libre geratu behar duen pasabidea 2 metrokoa izango da gutxienez, fatxadatik neurtuta. Udalak kasu bereziak salbuetsi ahal izango ditu, adibide gisa: pasalekua ez izatea,...

- b. Mahaiek eta aulkiek hartzen duten espaloi-zatiaren gehieneko zabalera ez da inola ere espaloiairen zabalaren erdia baino handiagoa izango, espaloiairen zabalera 4 metrotik gorakoa denean izan ezik. Lau metrotik gorakoa bada, espaloian gutxienez 2 metroko pasabide librea utzi behar da, jarritako hiri-altzarien elementuak horren barnean sartu gabe. Oinezkoentzat errespetatu beharreko pasabide librea aldatu ahal izango da, Udalaren erabaki arrazoitu baten bitartez, oinezkoen joan-etorri handiak hori eskatzen duenean.
- c. Mahaiek eta aulkiek ez dute inola ere galaraziko edo oztopatuko atari, merkataritza-etxabe eta inguruko finketarako sarbidea, ezta oinezkoen arintasuna ere, eta ezin izango dira jarri oinezkoen pasabideen parean edo jendea ibiltzen den lokaletako larrialdi-irteeren parean. Inguruko lokal eta etxebizitzetarako sarbidearen aurrean 2 m-ko zirkunferentzia libre utzi beharko da.

Establezimenduaren arduraduna izango da neurri hori betetzearen arduraduna, eta, beraz, behar beste aldiz zuzendu beharko du elementuen posizioa, bezeroek mugitu badituzte.

- d. Instalazioak eta/edo okupazioak luzetara gehienez hartuko duen espazioa ez da izango jarduera nagusiaren establezimenduaren fatxadaren luzera baino handiagoa, Udalak aldamenekoei kalterik eragiten ez zaiela uste duenean eta lizentzia-eskaerarekin batera aldamenekoen baimen idatzia aurkezten denean izan ezik.

Ez da baimen horren premiarik izango espaloiak, kasu bakoitzaren arabera, fatxadatik neurtuta, 4-5 metro libre utzi eta hortik aurrera eskatutako okupaziorako aukera ematen duenean. Udalak erabakiko du kasu bakoitzean gutxieneko distantzia.

Mahai kopurua tabernaren pareko espazio publiko librearen arabera zehaztuko da. Baimenak kopurua aipatuko du.

III. KAPITULUA

INSTALAZIOAK OINEZKOEN GUNEETAN, PLAZETAN ETA ESPAZIO LIBRE BEREZIETAN

6. artikulua.- Oinezkoen kaleak.

1.- Oinezkoen eremu edo kaleak nagusiki jendarteko topagune izango dira. Horregatik, eremu horietan ez da mahairik eta aulkirik jartzeko baimenik emango, udalak adierazitako pasabide librerako aukera eman ezean.

Neurri horretatik kanpo geratzen dira terrazaren erabilera eta gainerako aisialdi- eta pasabide-erabilerak bateragarri egiteko adinako azalera duten plazak. Elementuen posizioa eta kopurua kasu bakoitzean aztertuko dira.

2.- Oinezkoen eremuetan terrazak ezin izango dira jarri ibilgailuen zirkulazioa baimenduta dagoen lekuan (errodadura-eremua).

7. artikulua.- Plazak eta espazio libre bereziak.

1.- Eremu horietan terrazak jartzeko eskabideak kasu zehatz bakoitzaren berezitasunen arabera erabakiko dira, orokorrean aplikagarri izango diren muga hauek kontuan izanda:

a. Lorategi-eremuak, jolas-guneak eta atsedenlekuak errespetatuko dira. Ez da oinezkoen zirkulazioaren arintasuna oztopatuko.

b. Eremu horietan okupazio-lizentzia eskatu ahal izango duten bakarrak izango dira 1. artikuluan zehaztutako lokalen pertsona edo entitate titularrak.

c. Baimendutako terrazek hartzen duten eremua gehienez ere Udalak baimendutakoa izango da, lorategi-eremuak, jolas-guneak eta beste hiri-altzarien eremuak kenduta. Dena den, Udalak kasu bakoitzean erabakiko du okupatu daitekeen gehiengo azalera eta gune horietan non eta nola jarri beharko diren mahaiak eta aulkiak, hori guztia kapitulu honetan arautzen diren plazen edo espazio libre berezien erabilera publikoa bermatzeko asmoz.

d. Debekatuta dago mahaiak eta aulkiak pasabideetan jartzea.

e. Eremu bera okupatzeko eskabide bat baino gehiago egonez gero, establezimenduek hartu beharreko azalera Udalak erabakitakoa izango da, azaldutako neurriak oro har bete daitezen.

2.- Okupazioa ezin izango da udalak baimendutako azalera baino handiagoa izan.

3.- Behin aipatutako baldintzak kontuan hartuta, gehienez ere mahai- eta aulki-kopuru bat baimenduko da establezimendu bakoitzeko, 5.1.e) artikuluan ezarritakoaren arabera.

IV. KAPITULUA

BALDINTZA TEKNIKOAK ETA PUBLIZITATEKOAK

8. artikulua.- Publizitatea

Baimendutako eremua besterik ez da okupatuko.

Baimendutako establezimendu bakoitzeko mahai- eta aulki-kopurua, gehienez, baimendutako gehieneko eremuan banatzearen ondoriozkoa izango da, Udalak ezarritako gutxienekoak errespetatuz. Udal-zerbitzu teknikoek egingo dute banaketa hori, eta txosten bat egingo dute horri buruz, establezimendu bakoitzerako gehieneko kopurua eta terrazaren neurriak eta elementuen kokapena adierazita. Agiri hau establezimenduan bertan erakusgai egongo da.

9. artikulua.- Baldintza teknikoak

- a. Mahaiek eta aulkiek okupatzen duten eremua egun osoan garbitasun- eta higie-negoera egokian edukitzeko betebeharra du baimenaren titularrak. Erratza pasatu eta garbiketa egin beharko du behar den guztietan.
- b. Horretaz gain, lanaldi bakoitzaren amaieran altzarien elementuak establezimenduaren barrura sartu beharko ditu, Udalak berariaz baimendutako kasuetan izan ezik. Altzariak kanpoan uzteko baimena jasoz gero, metatuta eta lotuta utzi beharko dira. Okupatutako eremua garbitasun-egoera ezin hobean utzi beharko da.
- c. Debe katuta dago edozein ainguratze-sistema erabiltzea. Terraza edo lurra estaltzeko edo eguzkitakoak edo olanak egonkortzeko balio duten elementuen erabilera edo instalaziora ere zabaltzen da debekua, olanaren tamainarekiko proportzionala den erdiko kontrapisua baino harago badoaz.
- d. Baimendutako instalazioak bide publikoan okupatzen duen gunean edo hurbileko hiri-osagaietan kalteak edo akatsak eragin dituela ikusten bada, udal-administrazioak kalte horiek konpontzeko dagokion diru-zenbateko osoa exijituko du.
- e. Era berean, ostalaritzako jardueraren titularrak jarduera uzten badu, bide publikoa aurreko egoeran laga beharko du.

10. artikulua.- Beste elementuak

Aldez aurretik eta berariaz baimendutako eguzkitakoak, itzalkinak eta toldoak baino ezin izango dira jarri.

Debe katuta egon dira:

- Gordailu eta armairuak
- Terrazen eremua berotu edo freskatzeko sistemak/gailuak
- Edari eta izozkietarako hozkailuak, litxarrerriak, jolasak edo opariak saltzeko gailuak.
- Ikus-entzunezko ekipoak eta gailuak

11. artikulua.- Altzarien baldintzak

1.- Hiri-altzariei (mahaia, aulkiak, eguzkitakoak) nolabaiteko harmonia eta estetika emateko, altzari horiek honako ezaugarri hauek izan beharko dituzte ahal dela:

- Mahai eta aulkietarako, egurra eta plastiko gogorra lehenetsiko dira. Aluminiozkoak ere onartu dira, baina ahal dela ekidin egingo dira zaratatik eta emakumeen osasunean eragin negatiboa dutelako. Edozein kasutan, kolore neutroak erabiliko dira.
- Inola ere ezin izango da erabili marka komertzialen kolore biziko bereizgarriak dituzten publizitateko altzariak.

- Mahai eta aulkietan gehienez 15 x 15 cm-ko publizitatea jarri ahalko da.
- Mahaiek eta aulkiek gomazko babesgarriak izan behar dituzte hanketan, zaratak arintzeko.
- Aise pilatzeko modukoak izango dira, bilduta daudenean ahalik eta espazio gutxien okupa dezaten.

2.- Berariaz debekatzen dira aurrez deskribatutako baldintzak edo materialak betetzen ez dituzten publizitate-terraza estandarrak.

3.- Altzariak, oro har (mahaiak, aulkiak, toldoak, etab.), kontserbazio-egoera onean mantendu beharko dira beti.

4.- Eguzkitakoak: Mahai bakoitzerako indibidualak ezin izango dira lurrean ainguratu. Mahai bat baino gehiago estaltzen duten eguzkitako eta toldoetarako, berariazko lizentzia beharko da, eta ezin izango dira lurrean ainguratu.

5.- Ez da kablerik onartzen, ez airez, ez zuhaitzetan, energia elektrikoa terrazaraino garraiatzeko kableak barne.

6.- Terrazak, mahaitxoak eta elementu osagarriak jartzerakoan, Udal honek irisgarritasun unibertsala bermatzeko onartutako arauak eta planak hartuko dira kontuan. Era berean, nahitaez bete beharko dira Eusko Jaurlaritzaren 20/1997 Legean eta 68/2000 Dekretuaren II. eranskinean jasotako arauak eta baldintzak.

7.- Terrazetako edozein elementu jarri, bildu eta mugitzerako momentuan zaratarik gabe egiteko neurriak hartu beharko dira. Materialak garraiatzeko modu bezala gurpildun karroak erabili daitezke, beti baldin eta gurpilek soinua ateratzen ez badute. Terrazako altzariak lotzeko kateak erabiltzen badira, plastikozko edo bestelako materialez forratuta egon beharko dute, zarata egin ez dezaten.

12. artikulua. Euskararen erabilera sustatzeko neurriak.

Okupatutako eremuan jendearen eskueran eta bistan jartzen diren elementu guztiak euskaraz idatziko dira: menuak, prezioen zerrendak, kartelak, eskaintzen oharrak, arbeletako oharrak... Komunikazioa bermatzeko beste hizkuntzaren bat erabiltzea beharrezkoa bada, euskara nabarmendu beharko da.

V. KAPITULUA

ORDUTEGIAK

13. artikulua.- Baldintza orokorra

Debekatuta dago auzokoen lasaitasuna galaraztea zarata, oihu edo bestelako eragozpenen bidez, batez ere 22:00etatik aurrera. Nolanahi ere, debekatuta egongo da kanpoan megafonia edo musika-ekipoak jartzea.

14. artikulua.- Ordutegia

1. Okupazio-ordutegia honako hau izango da:

Instalazioa jarri: 07:30etatik aurrera, astegunetan eta 08:30etatik aurrera, asteburuetan, beti ere espazio publikoko garbiketa-lanak oztopatu gabe.

Instalazioa erretiratu

Aste Santutik urriaren 15era:

Igandetik ostegunera: 23:00etan.

Ostiral, larunbat eta jai-bezperetan: 24:30ean.

Urteko gainerako egunetan:

Igandetik ostegunera: 23:00etan.

Ostiral, larunbat eta jai-bezperetan: 24:00etan.

2.- Instalazioa erretiratzeko ordua iristen denerako, baimendutako material guztia erretiratuta eta okupatutako gunea garbi utzi beharko du titularrak.

3.- Udal-organo eskudunak, salbuespen gisa, instalazioa erretiratzeko ordutegi malguagoa baimendu ahal izango du, bai udalerrri osorako, bai udalerriko eremu jakin baterako, herriko jaietan eta garrantzi bereziko beste egun batzuetan.

4.- Leku berezietan, hala nola portxeetan eta plaza itxietan, edo etxebizitzan salaketak daudenean edo bizilagunei eragozpenak sortzen zaizkiela egiaztatzen denean, terrazak jartzeko eta jasotzeko ordutegia mugatu ahal izango da.

5.- Establezimenduen titularrek eragotzi egingo dute, terrazak ixteko ordutik aurrera, erabiltzaileek edariak lokaletik kanpo ateratzea.

15. artikulua.- Garbitasuna

Bide publikoa okupatzen duten mahaietan bazkariak eta/edo afariak eman nahi dituzten establezimenduek espresuki eskaera egin beharko dute bide publikoan terrazak jartzeko baimen eskaerarekin batera. Udalak kasu bakoitzean erabakiko du baimena eman edo ez.

Zerbitzua ezin izango da inola ere eman baimendutako terrazako mahai eta aulkietatik hurbil dauden hiri-altzarien beste elementu batzuetan.

Bazkari-zerbitzua baimentzen den kasuetan, erabilitako eremua egunero garbitu beharko da garbitasun produktu egokiak erabiliz.

Terrazak ahalik eta hondakin gutxien sortzeko moduan kudeatuko dira, bilgarriak,

apaingarriak eta erabili eta botatzeko beharrezkoak ez diren beste elementu batzuk saihestuz.

VI. KAPITULUA

BAIMENA EMATEKO BALDINTZAK

16. artikulua.- Iraupena

Bide publikoan terrazak jartzeko lizentzien iraupena gutxienez hilabete naturalekoa izango da, eta baimendutako epealdia bukatutakoan automatikoki bertan behera gelditzen dira lizentziok.

17. artikulua.- Prozedura

1.- Terrazak eta elementu osagarriak jartzeko, aurrez udal-baimena eskuratu behar da.

2.- Horretarako, interesdunak udaletxeko bulegoetan jaso ahal izango duen eskabide normalizatua aurkeztu beharko du, eta horrekin batera ondoko establezimenduen titularren edo bizilagunen baimena, baldin eta jarri nahi duen instalazioak ondoko establezimenduen fatxada edo portala ere hartzen badu.

3.- Lizentzia-eskabidearekin batera (edo lizentziaren aldaketa garrantzitsu bat egitean, hala nola mahai-kopurua, kokalekua, etab.), okupazioaren azterlan/bozeto bat ere aurkeztu beharko da, non, gutxienez, puntu hauek azalduko diren:

a) Lokalaren kokalekua zehaztuko da, instalazioak hartuko duen azalera, fatxadaren luzera eta ondorioz sortuko diren pasabideen zabalera adieraziz. Horretaz gain, dagoen edozein oztopo finkoren berri eman beharko du (trafiko-seinaleak, zuhaitzak, eserlekuak, hiri-altzariak, etab.).

b) Terrazan erabiliko diren altzariak: mahai kopurua eta toldoen ezaugarriak eta kopurua

c) Eskabidea zein aldi eta iraupenerako egin den adieraziko da.

d) Ondoko etxebizitzaren eta lokalen baimena duela egiaztatzen duen idatzizko agiria aurkeztuko da, hori eskatzen den kasuetan.

e) Jarduera itxitakoan mahaiak eta aulkiak kanpoan utzi nahi izanez gero lizentzia-eskaerarekin batera jakinarazi beharko da.

Adierazitako informazio horrekin, udaleko hirigintza sailak plano bat osatuko du instalazioak hartzen duen bide publikoaren zatian mahaiak eta aulkiak nola banatuko diren jasoko duena.

Dokumentazio hori aurkeztu beharko da bakarrik ordenantza hau indarrean jarri ondoren

egiten den lehen lizentzia-eskaerarekin, baita lizentziaren aldaketa garrantzitsu bat egiten denean ere (mahai-kopurua, kokalekua, etab.).

4.- Baimenaren edukian aldaketa garrantzitsua eragiten duten gainerako kasuetan, interesduna behartuta egongo da baimena eskatzera artikuluko honen 3. atalean xedatutakoaren arabera.

5.- Interesdunak altzariak lokalaren barruan ez jasotzea eskatu nahi badu, baimena eskatu beharko du altzariak bide publikoan pilatzeko, eta plano batean adieraziko du egiten duen lekuaren proposamena.

18. artikulua.- Baldintza orokorrak

1.- Lizentziak beti jabetza-eskubideari kalterik egin gabe eta hirugarrenei eragozpenik sorrarazi gabe emandakotzat joko dira. Eta ezin izango da erabili lizentzia hori onuradunak bere jarduerak betetzerakoan eragin lezakeen erantzukizun zibil edo penala kentzeko edo murrizteko, eta, halaber, lizentziak ez du titularra beste baimen batzuk eskuratu behar izatetik salbuesten.

2.- Lizentziaren dokumentuan honako hauek zehaztuko dira: instalazioaren eta elementuen baldintzak, okupatu daitekeen azalera, mahai- eta aulki-kopurua, lizentziaren indarraldia, eta beharrezkotzat jotzen diren gainerako berezitasunak, hala nola, libre utzi beharreko oinezkoen pasabidea eta mahaiak pilatzeko lekua (lokalaren barnean izatea salbuesten den kasuetan). Halaber, plano bat erantsiko da, okupatu daitekeen gehieneko azalera eta kokapena adierazita.

3.- Lizentziak prekario izaera izango du beti eta, trafikoko, urbanizazioko, Udalak berak antolatu edo baimendutako ekitaldietarako okupazioko inguruabarrek edo interes orokorreko beste edozein inguruabarrek hala gomendatzen dutenean, udal-agintariak baimendutako instalazioak bide publikotik kentzeko agindu ahal izango dute, modu arrazoituan; horrenbestez, partikularrak agindutakoa bere kontura egin beharko du, eta ez du inolako kalte-ordainik jasotzeko eskubiderik izango.

4.- Ordenantza honek arautzen dituen lurzoru publikoaren erabilera eta instalazioa direla-eta, bide publikoan eta hirugarrenei kalterik eraginez gero, lizentziaren titularra behartuta dago kalte guztiak konpontzera.

5.- Udalak edozein unetan egiazta dezake lizentziaren titular izateko ezarritako baldintzak behar bezala betetzen direla, eta betetzen ez badira, lizentzia baliogabetu egingo da.

Lizentzia lortu ondoren, lizentziari erantsitako planoan adierazitako baimendutako gehieneko okupazio-azalera eta mugaketa errespetatuko ditu lizentziaren titularrak. Plano hori ikusteko moduan egon beharko da instalazioan bertan, eta udal-agintaritzak eskudunari erakutsi beharko zaio, hala eskatzen badio.

19. artikulua.- Baimenak berritzea

1.- Baimenek gutxienez hilabete natural baten eta gehienez urte natural baten iraupena

izango dute. Epe hori bukatzean, interesdunek baimena berritzeko eskatu beharko dute.

2.- Baimenaren indarraldia bukatutakoan, lizentziaren titularrak eta, hala badagokio, dagokion establezimenduarenak, instalazio guztia kendu eta bide publikoa aurreko egoeran utzi beharko du.

3.- Hurrengo denboraldietarako lizentzia berritzea eskatu nahi bada, eta lizentzian aldaketa handirik egin behar ez bada, nahikoa izango da eskabidearekin batera ondoko establezimenduen eta bizilagunen adostasuna berritzen duen dokumentua aurkeztea, baldin eta lizentzia eragin zuten egoerako baldintzak aldatu ez badira.

Lizentzia berritzeko eskaerak automatikoki onartutzat joko dira, baldin eta aurreko paragrafoan aipatutako dokumentazioarekin batera okupazioari dagozkion tasak eta ordainarazpenak ordaindu izanaren agiria aurkezten bada; ordaintzen diren unetik aurrera onartutzat joko dira, betiere Udalak eskatutako baimena ez ematea erabaki eta hilabeteko epean jakinarazten ez badio eskatzaileari.

20. artikulua.- Hondakinak

1.- Izaera orokorreko edo ordenantza honetatik eratorritako betebeharez gain, instalazioaren titularra behartuta dago baimentzen den okupazioko lurra, instalazioa bera eta elementu osagarriak garbitasun-, segurtasun- eta apaintasun-egoera ezin hobean edukitzera; eta horretarako, beharrezkoak diren bitarteko guztiak jarriko ditu, hala nola, paperontziak, hautsontziak, etab., betiere hondakinak frakziotan jaso eta udal zerbitzura eramateko betebeharra betez, hondakinen udal ordenantzak ezartzen duen bezala.

Nolanahi ere, terrazen instalazioak ez ditu bideak garbitzeko lanak oztopatuko.

VII. KAPITULUA

ZIGOR-ARAU BIDEA

21. artikulua.- Lizentziarik gabeko instalazioak.

1.- Lizentziarik gabe bide publikoan jarritako terrazak udal-agintariak kendu ahal izango dituzte berehala eta kautelaz, eta baita dagokien biltegian utzi ere. Hori ez da eragozpen izango, hala ere, dagozkion zigorrak ezartzeko.

2.- Zehapen-ondorioetarako, lizentziaren indarraldia bukatutakoan terrazak ez kentzea udal-baimenik ez izatearen parekotzat joko da.

22. artikulua.- Arau-haustekak.

Ordenantza honen ondorioetarako, arau-haustek sailkatzeko orduan, arinak eta larriak izan daitezke.

1.- Arau-hauste arintzat joko dira honakoak:

- a).- Terrazak ezarri den ordutegiaz kanpo jartzea.
- b).- Baimendutako elementu-kopurua baino gehiago jartzea (mahaiak, aulkiak edo bestelako elementu osagarriak) edo baimendutakoa baino azalera handiagoa hartzea.
- c).- Mahaiak, aulkiak edo elementu osagarriak baimendutako kokalekutik kanpo jartzea.
- d).- Okupazio-eremua apaintasun-, segurtasun- eta garbitasun-egoera egokian ez edukitzea.
- e).- Ordenantza honetan ezarritako araudia ez betetzea.

2.- Arau-hauste larritzat joko dira honakoak:

- a).- Terrazak eta bestelako elementu osagarriak lizentziarik gabe jartzea.
- b).- 18. artikuluan adierazitakoak (ordenantza honi loturik dauden elementuak 11. artikuluan ezarritako baldintza teknikoak bete gabe jartzea.)
- c).- Zigor-espedienteari hasiera eman aurreko urtean, hiru arau-hauste arin eginak izatea eta horregatik ebazpen irmo bidez zigorra ezarria izatea.

23. artikulua.- Zigorrak.

1.- Ordenantza honetako arau-haustek direla-eta, eskala honen arabera ezarriko dira isunak:

- a.- Arau-hauste arinak: 200 eta 800 euro arteko isuna eta/edo lizentzia baliogabetzea eta, ondorioz, instalazioa berehala kentzea, udal-agindua betetzen ez bada, eta/edo aurrerantzean establezimendua ez izatea gai ordenantza honetan araututako baimenak lortzeko, 12 hilabeteko epera arte.
- b.- Arau-hauste larriak: 800 eta 3.000 euro arteko isuna eta/edo aurrerantzean establezimendua ez izatea gai ordenantza honetan araututako baimenak lortzeko, 2 urteko epera arte, gertakarien larritasunaren arabera.
- c.- 22.1.b) eta 22.2 a) artikuluetan jasotako arau-hauste larriak, Zergen Foru Arau Orokorraren arabera zigortuko dira, okupazioarengatik dagozkion tasak ordaindu behar izateari kalterik egin gabe.

2.- Okupazioa gerora legeztatzen bada, eta arau-haustea berriz gertatu ez bada edo udal-aginduak betetzeari uko egin ez bazaio, zigorra soilik ekonomikoa izatera muga daiteke.

3.- Ordenantza honetan ezarritako zigorren zenbatekoak urtero eguneratuko dira automatikoki, Estatuko kontsumoko prezioen indizearen arabera, aurreko urteko zigor-zenbatekoari aplikatuz.

24. artikulua.- Zigor-espedientea.

Bidezkoak diren zigorrak ezartzeko, ezinbestekoa izango da aurrez dagokion espedientea bideratzea, eta espediente hori martxoaren 16ko 1/2023 Legean, Euskal Administrazio Publikoen zehatzeko ahalari buruzkoan xedatutakoaren arabera izapidetuko da.

25. artikulua.- Betearazpen subsidiarioa.

1.- Bide publikoan jarritako elementuak kentzeko agintzen badu Udalak, eta instalazioaren arduradunak agindu hori betetzen ez badu horretarako ezarritako epean, ordenantza honetan aurreikusitako kasuetan, Administrazioak elementuak kentzeari ekin ahal izango dio betearazpen subsidiarioz, eta horretarako izendatutako tokian utzi. Jabetzak hortik eskuratu ahal izango ditu, aurrez dagozkion gastuak ordainduta, hala ezartzen baitu Administrazio Publikoen Prozedura Erkidearen azaroaren 26ko 39/2015 Legearen 102. artikulua.

2.- Artikulu honetan xedatutakoaren arabera kendutako elementuak gehienez ere sei hilabetez egongo dira biltegian. Epe hori bukatu eta interesdunak eraman ez baditu, Udalak hondakin gisa kudeatu ahal izango ditu, obligaziodunaren kargura.

LEHEN XEDAPEN GEHIGARRIA

Behar bezala justifikatutako salbuespeneko inguruabarrak daudenean (osasun-arlokoak, obrak, udalerrian salbuespeneko jardura puntual batzuk antolatzeak, segurtasun-arlokoak edo antzekoak), ordenantza honetan aipatzen diren jardueren enpresa titularrei terraza jartzeko aldi baterako baimena eman ahal izango zaie.

Xedapen gehigarri honetan zehaztutako baimenak lortzeko prozedura honako hau izango da: Pertsona edo erakunde interesdunak eskaera egingo du gutxienez bi hilabeteko aurrerapenarekin, eta gero alkateak ebazpena emango du. Ebazpenean, bidezkoa bada, salbuespen-egoera justifikatuko da, eta baimena emateko salbuespeneko baldintzez gain, baimenaren iraupena ere zehaztuko da. Epea bukatutakoan, automatikoki bertan behera geldituko da baimena, erabaki baten premiarik gabe.

Ebazpenean berariaz ezarri ez den guztirako, ordenantza honen aurreko artikuluetan xedatutakoa aplikatuko da.

Alkatetzaren ebazpenean ezarritako baldintzak betetzen ez badira, ordenantza honetako VII. kapituluan araututako zigor-araubidea aplikatuko da.

LEHEN XEDAPEN IRAGANKORRA

Terrazak jartzeko emandako baimenak pixkanaka ordenantza honetan ezarritako baldintza tekniko eta publizitate-baldintzetara egokitzeko, ordenantza argitaratzen denetik urte beteko egokitzen epea ezarri da. Egun horretatik aurrera, terrazak osatzen dituzten osagai guztiek ordenantza honetan ezarritako baldintza teknikoak eta publizitatekoak bete beharko dituzte.

AZKEN XEDAPENAK

- 1.- Ordenantza hau Toki Araubidearen Oinarriak arautzen dituen apirilaren 2ko 7/1985 Legearen 70.2 artikuluan xedatutakoaren arabera jarriko da indarrean, behin bere testua osorik argitaratu eta lege horren 65.2 artikuluan aurreikusitako 15 egun balioduneko epea igaro ondoren.
- 2.- Udal-agintaritzari berariazko baimena ematen zaio lizentziak eman ahal izateko eta ordenantza hau interpretatu, argitu eta garatzeko, betiere administrazio-prozedura erkideari buruzko legedian jasotako printzipioen arabera.